

## КӨНІЛ АЙТУ ЖЕДЕЛХАТЫН ЖОЛДАДЫ

Президент Қасым-Жомарт Тоқаев көрнекті ақын, Мемлекеттік сыйлықтың лауреаты, Қазақстанның еңбек сіңірген қайраткері Несіпбек Айтұлының дүниеден өтуіне байланысты отбасы мен жақын туыстарына көңіл айтты.

«Несіпбек Айтұлы ұлттық өнеріміз бен мәдениетімізді өркендетуге сүбелі үлес қосып, руханият саласының алға басуына күш-қайрат жұмсады. Қазақстан тәуелсіздігінің жыршысына айналған ақынның тартымды туындылары оқырмандар тарапынан жоғары бағасын алды. Өнегелі ғұмыр кешіп, соңына мол әдеби-мәдени мұра қалдырған Несіпбек Айтұлының жарқын бейнесі ұмытылмайды. Марқұмның иманы саламат, жаны жәннатта болсын», – деп жазылған жеделхатта.



## БАСПАНА НАРЫҒЫ, БОЛА МА ЖАРЫҒЫ?

Жылжымайтын мүлік нарығында тұрғын үйдің жетіспеушілігі бағаның жиі қымбаттауы мен бір деңгейде тұрақтап қалуының басты аргументі екенін жиі естиміз. Мәселен, 2022 жылы тұрғын үй қорының тапшылығы 114 млн шаршы метрге жеткен. Ал жеке және мемлекеттік емес заңды тұлғаларға тиесілі жылжымайтын мүлік көлемі – 397 млн шаршы метр. Осыған дейін сарапшылар ипотека нарығында мемлекеттің үлесі шамадан тыс жоғары болғандықтан, екінші деңгейлі банктер өз әлеуетін толыққанды пайдалана алмай отырғанын алға тартатын. Бірақ биылдан бастап мемлекеттік бағдарламаға лимит бекітілгені азаматтардың наразылығын туғызды. Өйткені айлар бойы онлайн кезекте тұрғанымен, белгіленген күні сайттар санаулы секундта жұмысын тоқтатады.

Мемлекеттік «7-20-25» ипотекалық бағдарламасы 2018 жылы әлеуметтік осал топтарға жатпайтын, бірақ баспанаға мұқтаж жандарға арнап іске қосылған еді. Оның шарттарына сәйкес, жұмыс істейтін, басында баспанасы жоқ кез келген азамат 20 пайыздық бастапқы жарнаны төлеу арқылы 7 пайыз жылдық мөлшерлеменен 25 жылға дейінгі

ипотека рәсімдей алатын. Бірақ тек жаңадан пайдалануға берілген үйді тікелей құрылыс компаниясынан сатып алуыңыз қажет. Бағдарлама іске қосылғаннан бастап 2022 жылдың желтоқсанына дейін 852,2 миллиард теңгеге жалпы саны 64 146 жеңілдетілген қарыз берілген.

(Жалғасы 4-бетте)

## КӨК ТҮТІН МЕН ҚОҒЫСТАН АРЫЛМАҒАН



Қарағанды облысы қысы-жазы көк түтінмен, жыл он екі ай заңсыз тасталған қоқыспен күресіп келе жатыр. «АрселорМиттал» кәсіпорны 2024 жылға қарай эмиссияларды 30%-ға, яғни 65 мың тоннаға төмендету жөніндегі жасалған меморандум шеңберінде өзіне алған міндеттемелерін орындамай отыр. Ал Балқаш мыс балқыту зауыты жабдықтарының технологиялық тозуынан қаладағы ауа ластануда. Сонымен қатар биылғы алғашқы алты айда ғарыштық мониторинг қорытындысы бойынша облыс аумағында 739 заңсыз қоқыс орны анықталған.

– Қарағанды облысы – қоршаған ортаға кері әсер ететін «Қазақмыс» корпорациясы, «АрселорМиттал Теміртау» өндірістік объектілері және басқа да ірі кәсіпорындар шоғырланған өнеркәсіптік өңір. 2023 жылдың алғашқы жылында облыс бойынша шығарындылар көлемі 243,1 мың тоннаны құрады. Оның ішінде Қарағанды қаласы – 17,2 мың тонна, Теміртау қаласы – 112,8 мың

тонна және Балқаш қаласы бойынша – 36,1 мың тонна, – деді Қарағанды облысы бойынша Экология департаментінің басшысы Дархан Исжанов.

Теміртаудың атмосфералық ауасын негізгі ластанушы – «АрселорМиттал Теміртау» АҚ.

– Бұл ретте, «АрселорМиттал» кәсіпорны 2024 жылға қарай эмиссияларды 30%-ға, яғни 65 мың тоннаға төмендету жөніндегі жасалған меморандум шеңберінде өзіне алған міндеттемелерін орындамай отыр. 2019–2023 жылдарға 23 шара белгіленсе, оның жетеуі ғана жүзеге асқан, – дейді департамент басшысы.

Кәсіпорында экологиялық проблемадан басқа, өрескел заңбұзушылық тіркелген. Мысалы, Теміртау қаласының аумағында 800 тонна көлемінде кокс-химия өндірісінде қауіпті қалдықтарды заңсыз сақтау фактісі анықталған. Теміртау қаласының Полиция басқармасы қылмыстық істі жүргізіп жатқанына 1 жылдан астам уақыт өтсе де компания жауапкершіліктен толық бас тартып отыр.

7»

## 111 БАЙЛАНЫС ОРТАЛЫҒЫ МИНИСТРЛІККЕ БЕРІЛДІ



Бүгіннен бастап «AMANAT»-тың отбасы, әйелдер және балалардың құқықтарын қорғау мәселелері бойынша «111 байланыс орталығы» партиядан Цифрлық даму, инновациялар және аэроғарыш өнеркәсібі министрлігіне берілді. Тиісті меморандумға Бала құқықтары жөніндегі уәкіл Динара Зәкіева, «AMANAT» партиясының Атқарушы хатшысы Дәулет Кәрібек және Цифрлық даму, инновациялар және аэроғарыш өнеркәсібі министрі Бағдат Мусин қол қойды.

3»

## ҚОҒАМДЫҚ БАҚЫЛАУДЫҢ ЖАҢА ТЕТІГІ

Тура екі апта бұрын, 2 қазанда ел Президенті «Қоғамдық бақылау туралы» және оған ілеспе заңдарға қол қойды. Ертесіне, 3 қазанда актілер баспасөзде ресми жарияланды. Алайда ел тарихында алғаш рет қабылданған, халықтың петиция беруін заңдастыратын заңдар сол бойы күшіне енбеді. Неге?



Атап өтер жайт, Президенттің Жолдауына сәйкес әзірленген

«Қоғамдық бақылау туралы» заңында петиция деген бір сөз таба

алмайсыз. Бірақ Сенаттың Әлеуметтік-мәдени даму және ғылым комитетінің мүшесі Руслан Рүстемовтің түсіндіруіне, бұл заң соған қажетті ұстындарды, қоғамдық бақылаудың негіздерін түзеді, мемлекеттік органдардың ашықтық дәрежесін кеңейтіп, азаматтардың қоғамдық белсенділігін арттыруға ықпал етеді.

Ал петицияға ілеспе заң – «Кейбір заңнамалық актілерге қоғамдық бақылау, әкімшілік рәсімдерді жетілдіру мәселелері бойынша өзгерістер мен толықтырулар енгізу туралы» заңы арналып отыр. Оған да Мемлекет басшысы 2023 жылғы 2 қазанда қол қойды.

(Жалғасы 4-бетте)

## ЕЛ ҮШІН ЕТКЕН ЕҢБЕК ЕЛЕУСІЗ ҚАЛМАЙДЫ



7  
БЕТ

## ТАЛДЫДА ТАЛАЙ ТАРИХ БАР



8  
БЕТ

## ЖӘНІБЕКТІҢ ЖАРҚЫН ЖЕҢІСІ

Қазақстандық кәсіпқой боксшы Жәнібек Әлімханұлы әлем чемпионы атанды. Ол (15-0, 10 KO) АҚШ-тың Техас штаты Розенберг қаласында өткен бокс кешінде германиялық былғары қолғап шебері Винченцо Гуальтьериді жеңіп, WBO және IBF санаты бойынша орта салмақта екі белбеу иеленді. Мемлекет басшысы Қасым-Жомарт Тоқаев спортшыны жарқын жеңісімен құттықтады.

«Жәнібек Әлімханұлы WBO және IBF тұжырымдарынан әлем чемпионы атағы үшін өткен жекпе-жектегі жарқын жеңісімен құттықтаймын. Жәнібек қазақ бокс мектебінің жоғары деңгейі мен мықтылығын әлемге тағы да паш етті. Бұл жеңіс бокспен айналысатын жастарды биік белестерді бағындыруға ынталандырады. Сізге зор денсаулық, бақ-береке тілеймін. Жеңістен жеңіске жете беріңіз!», – деді Президент.

8»





## ОТЫРЫСТЫҢ КҮН ТӘРТІБІН БЕКІТТІ

**Сенат Спикері Мәулен Әшімбаевтың төрағалығымен палата бюросының отырысы өтті. Онда депутаттар 19 қазан күні болатын Сенат отырысының күн тәртібін бекітті.**

Сенаттың алдағы отырысында депутаттар «Еуразиялық қайта сақтандыру компаниясын құру туралы келісімді ратификациялау туралы» заңды қарайды. Бұл заңға Еуразиялық экономикалық

одакқа мүше мемлекеттер қол қойған және ол экономикалық өсуге, өзара және сыртқы сауда-экономикалық байланыстарды кеңейтуге ықпал етуге арналған.

Келісімді қабылдау ЕАЭО-ға мүше мемлекеттердің қаржы ұйымдарына өзара халықаралық сауда және инвестициялық қызметті қолдауға, сондай-ақ бірлескен бизнес-жобалардың үшінші елдердің нарықтарына шығуына белсенді қатысуға мүмкіндік береді.

## 70 МЫҢ ЖҮРГІЗУШІГЕ АҚШАСЫ ҚАЙТАРЫЛАДЫ

**Қарағанды көлік прокуратурасы ақылы автомобиль жолдарымен жүру негіздері туралы жария шартта автокөлік жүргізушілерінің құқығына қайшы келетін талапты анықтады.**

Атап айтқанда, жедел жол қызметтерін тұтынушылар көліктің мемлекеттік тіркеу нөмірін ауыстырған жағдайда пайдаланылмаған төлемдерді қайтара алатын тармақ болмаған. Бүгінде тиісті түзетулер енгізіліп, ол туралы ақпарат «Қазавтожол» АҚ-ның ресми сайттарында орналастырылды.

Жалпы, прокуратураның талдауы Қарағанды облысы бойынша 69 мың автокөлік жүргізушісіне 38 млн теңгеден астам сомаға аванстық төлемдер қайтарылмағанын көрсетті. Прокуратураның араласуынан кейін ғана тұтынушылардың мүліктік құқықтарын қалпына келтіру жұмыстары басталды.

Сондай-ақ ұлттық оператордың мүдделерін қорғау өте әлсіз жүргізілгені анықталды. Себебі осы қызметтерді алған 138 мың тұтынушының 3 жыл ішінде 50 млн теңге берешегі жинақталғаны белгілі болды.

Көбіне мұндай адамдарға қатысты материалдар ақылы автомобиль жолдарымен жүргені үшін уақытылы төленбеу белгілері бойынша оларды әкімшілік жауапкершілікке тарту мақсатында көліктің бақылау инспекциясына жолданбаған.

Прокуратураның актісі бойынша «Қазавтожол» АҚ филиалының басшылары жол ақысын төлемеген автокөлік жүргізушілеріне қатысты әкімшілік ықпал ету шараларынан алшақтатқаны үшін тәртіптік жауаптылыққа тартылды.

Аталған жұмыс еліміздің барлық өңірінде жүргізілетін болады.



## БОРАНБАЕВ ҚОНАҚҮЙІН МЕМЛЕКЕТКЕ ҚАЙТАРДЫ

**Қаржы мониторингі агенттігі Қайрат Боранбаевтың мүлкін мемлекетке қайтару шараларын қабылдап жатыр.**

«Қ.Боранбаевтың компаниялары Мемлекеттік мүлік комитетіне жалпы құны 1,4 млрд теңгеден асатын Comfort Hotel Astana қонақүй кешенін мемлекет меншігіне өз еркімен беру үшін тиісті өтінімдер берді.

Аумағы 5 мың шаршы метрден асатын бұл қонақүй кешенінің жылдық айналымы 900 млн теңгеге жуық», – делінген агенттік хабарламасында.

Қолданыстағы заңнамаға сәйкес, бұл нысанды демалыс, сауықтыру және білім беру орталықтарын ұйымдастырумен әлеуметтік мақсатта пайдалану жоспарлануда.

Активтерді қайтару бойынша белсенді жұмыстар жалғасып жатыр.



## МӘЖІЛІСТЕ ПАРЛАМЕНТТІК ТЫҢДАУ ӨТЕДІ



**20 қазанда Мәжілісте парламенттік тыңдау өтеді. Тақырыбы – «Халықтың шамадан тыс кредит алуын азайту және қаржылық сауаттылықты арттыру туралы».**

Парламенттік тыңдауға Мәжіліс пен Сенат депутаттары, орталық мемлекеттік және жергілікті атқарушы органдардың, Ұлттық банктің басшылары, қоғамдық ұйымдар мен БАҚ өкілдері қатысады.

Жиында халықтың кредит алуын төмендету және қаржылық сауаттылығын арттыру, лудомания мен киберқылмыстың, соның ішінде интернет алаяқтықтың әсерінен азаматтардың кредит алуы, сондай-ақ қаржы ұйымдарының пайдасына қарыздарды өндіріп алу бойынша жеке сот орындаушыларының

жұмыс тәжірибесі туралы қабылданатын шараларды талқылау жоспарлануда.

Іс-шарада Премьер-Министрдің орынбасары – Қаржы министрі Ерұлан Жамаубаев, Қаржы нарығын реттеу және дамыту агенттігінің төрайымы Мәдина Әбілқасымова, Ішкі істер министрінің орынбасары Игорь Лепеха баяндама жасайды. Парламенттік тыңдаудың қорытындысы бойынша Қазақстан Республикасының Үкіметіне ұсынымдар әзірленетін болады. Парламенттік тыңдауды Мәжілістің Қаржы және бюджет комитеті ұйымдастырады. Отырыс Мәжілістің жалпы отырыс залында сағат 10:00-де басталады. Мәжілістің сайтында және әлеуметтік желілердегі аккаунттарында онлайн көрсетіледі.

## БЕЙБІТШІЛІК ЖӘНЕ ҚАУІПСІЗДІК МӘСЕЛЕЛЕРІН ТАЛҚЫЛАДЫ



**Алматыда Орталық Азия елдері әйелдерінің диалог алаңында «Әйелдер, бейбітшілік және қауіпсіздік» тақырыбында халықаралық конференция өтті. Іс-шара Біріккен Ұлттар Ұйымы мен Қазақстан Республикасы Президентінің жанындағы Әйелдер істері және отбасылық-демографиялық саясат жөніндегі ұлттық комиссияның қолдауымен ұйымдастырылды.**

Қазақстан 2023 жылы Орталық Азия елдері әйелдерінің диалогіне төрағалықты қабылдады. Бұл – өңірлік әйел парламентшілері арасындағы ынтымақтастықты дамыту мен нығайтудың өзекті мәселелерін талқылауға арналған халықаралық платформа.

Конференция аясында Қазақстан, Қырғызстан, Өзбекстан, Тәжікстан, Түрікменстан Парламенттерінің депутаттары, қатысушы елдердің мемлекеттік органдарының басшылары, Қазақстан Президенті жанындағы Әйелдер істері және отбасылық-демографиялық саясат жөніндегі ұлттық комиссияның, халықаралық ұйымдардың, дипломатиялық корпусстың өкілдері және қоғам қайраткерлері кездесті.

Қазақстан Республикасы Парламенті Мәжілісі Төрағасының орынбасары Дания Еспаева бүгінде әлемнің әртүрлі өңіріндегі қаттығыстардың өршуі мен тұрақсыздықтың артуы әйелдердің ролі мен жағдайын қиындатқанын атап өтті.

– Таяу Шығыстағы шиеленіскен жағдайда мұның маңызы ерекше. Соның әсерінен әйелдер де, балалар да қоғамдағы ең осал топ ретінде құрбан болуда. Ал бүгін біз талқылап отырған күн тәртібін қарулы қаттығыстар мен гуманитарлық апаттар кезіндегі әйелдердің қауіпсіздігіне қатысты мәселелерді егжей-тегжейлі шешу қажеттілігі призмасы арқылы қарау керек, – деді Мәжілістің вице-спикері.

Сонымен қатар Дания Еспаева әйелдер мен қыздарға қатысты гендерлік зорлық-зомбылыққа байланысты мәселелерге назар аударды. Қазақстан оған қарсы өңір елдерінің күш-жігерін біріктіруге шақырады. Осы бағыттағы тиімді қадамдардың бірі – Еуропалық одақ пен БҰҰ-ның Орталық Азия мен Ауғанстан елдері үшін әйелдер мен қыздарға

қатысты гендерлік зорлық-зомбылықтың барлық нысанын жою жөніндегі аймақтық бастамасын іске қосу болды. (SpotLight, Жарық сәулесі). Жоба Қазақстан Президенті Қасым-Жомарт Тоқаевтың тарапынан қолдау тапты.

Бұдан әрі Мәжілістің вице-спикері Қазақстанда 2030 жылға дейінгі отбасылық және гендерлік саясат тұжырымдамасы іске асырылып жатқанын, онда «Әйелдер, бейбітшілік және қауіпсіздік» күн тәртібін іске асыруға бағытталған бөлім бар екенін, сондай-ақ БҰҰ Қауіпсіздік Кеңесі қарарларын іске асыру жөніндегі ұлттық іс-әрекет жоспары қабылданғанын айтты. Ол Қазақстан БҰҰ-ның бітімгершілік даярлық орталығы (Казцент) базасында сертификатталған курстар аясында әскери кенешші-әйелдерді даярлау бойынша белсенді жұмыс жүргізіп жатқанына тоқталды. Бұл ретте әйел әскери қызметшілер Қазақстан Қарулы Күштерінің барлық жеке құрамының 13,7%-құрайды, олардың 10-ы басшылық лауазымдарды атқарады.

Вице-спикер қазақстандық әйел дипломаттардың қарусыздану, таратпау және халықаралық қауіпсіздік мәселелері бойынша халықаралық келіссөздер мен консультациялардағы ролі туралы айтып берді.

Конференцияға қатысушылар сессиялар аясында тақырыптық талқылауды жалғастырды. Олар Орталық Азиядағы қауіпсіздік саласындағы жаңа сын-тегеуріндерді және өңірдегі «Әйелдер, бейбітшілік және қауіпсіздік» күн тәртібін ілгерілету мүмкіндіктерін қозғалды.

Сондай-ақ алаңда қатысушы елдердің белсенді әйелдері халықаралық ұйымдардың өкілдерімен диалог жүргізді. Талқылауға БҰҰ-әйелдер құрылымы Өңірлік кеңесінің кеңесшісі Наргис Азизова, БҰҰ Бас хатшысының арнайы өкілі, БҰҰ Орталық Азия үшін алдын алу дипломатиясы жөніндегі өңірлік орталығының басшысы Каха Имандзе, БҰҰ-ның босқындар ісі жөніндегі Жоғарғы комиссарының Орталық Азиядағы өкілі Ганс Фридрих Шолдер және Қазақстандағы үкіметтік емес ұйымдардың өкілдері қатысты.

Конференция соңында қатысушылар өңірде БҰҰ Қауіпсіздік кеңесінде «Әйелдер, бейбітшілік және қауіпсіздік» қарарын іске асыру бойынша жұмысты күшейту үшін жағдай жасау жөніндегі міндеттемелері бар қорытынды құжат қабылдады.











